

SIARAN MEDIA

THP CATAT PENDAPATAN SUKU PERTAMA YANG LEBIH KUKUH DIDORONG HARGA CPO YANG TINGGI, UNTUNG OPERASI MENINGKAT 37%

Kuala Lumpur, 23 Mei 2025 – TH Plantations Berhad ("THP" atau "Kumpulan THP") mencatatkan pendapatan sebanyak RM179.1 juta bagi suku pertama berakhir pada 31 Mac 2025, meningkat 14% berbanding tempoh yang sama tahun lalu. Peningkatan ini disumbangkan terutamanya oleh harga purata jualan yang lebih tinggi bagi minyak sawit mentah (CPO), isirung sawit (PK), dan buah tandan segar (FFB), meskipun jumlah jualan bagi ketiga-tiga produk utama ini mencatatkan penurunan.

Keuntungan sebelum cukai (PBT) Kumpulan menurun sebanyak 7.6% kepada RM25.5 juta, disebabkan oleh keuntungan nilai saksama yang lebih rendah ke atas aset biologi, kerugian pertukaran mata wang asing belum direalisasi, serta kekurangan penuai buah sawit yang berkemahiran.

Sekiranya tidak mengambil kira kesan keuntungan nilai saksama yang lebih rendah ke atas aset biologi dan kerugian pertukaran mata wang asing belum direalisasi, PBT operasi Kumpulan sebenarnya meningkat sebanyak 37% berbanding suku yang sama tahun lalu — menunjukkan prestasi teras yang lebih kukuh.

Bekalan minyak sawit menunjukkan peningkatan baru-baru ini, namun harga CPO kini berada pada paras terendah bagi tahun ini. Sebagai pemain huluan, prestasi THP sangat dipengaruhi oleh turun naik harga CPO.

THP kekal optimistik dan berwaspada terhadap prospek industri, disokong oleh permintaan global yang stabil terhadap minyak sawit. Kumpulan turut mengambil langkah posisi hadapan (*forward position*) bagi mengurangkan ketidakpastian dan penyusutan harga CPO.

Menurut Ketua Pegawai Eksekutif THP, En. Mohamed Zainurin Mohamed Zain, "Kumpulan THP akan terus memberi tumpuan terhadap inisiatif peningkatan hasil, mekanisasi, dan pengoptimuman kos demi memperkukuh daya tahan operasi, sejajar dengan AL-Falah 22/22 – Pelan Strategik Perniagaan Lima Tahun THP. Antara strategi utama termasuk memperluas program penanaman semula dengan bahan tanaman berproduktiviti tinggi, mempercepatkan usaha pendigitalan, serta memperkukuh pematuhan ESG selaras dengan piawaian kelestarian global. THP komited untuk terus menyampaikan nilai jangka panjang kepada para pemegang taruh sambil memastikan pertumbuhan operasi yang mampan dan bertanggungjawab."

Dengan andaian tiada halangan luar jangka, Kumpulan menjangkakan prestasi kewangan yang memuaskan bagi tahun kewangan berakhir 31 Disember 2025, dan kekal optimis terhadap keberkesanan strategi serta inisiatif yang sedang dilaksanakan dalam menangani cabaran semasa.

TH PLANTATIONS BERHAD (197201001069 (12696-M))

Tingkat 23, Menara TH Selborn

153, Jalan Tun Razak

50400 Kuala Lumpur

Tel: 03 2603 4800 Fax: 03 2603 4695



SIARAN MEDIA

Mengenai THP

Sebagai cabang perladangan Lembaga Tabung Haji, THP terlibat dalam penanaman kelapa sawit, getah dan pokok jati. Ia pertama kali diperbadankan pada tahun 1972 sebagai Perbadanan Ladang-Ladang Tabung Haji Sendirian Berhad dan disenaraikan di Papan Utama Bursa Malaysia Securities Berhad pada 27 April 2006.

THP memiliki lebih daripada 97,000 hektar tanah perladangan, yang merangkumi 38 ladang dan 6 kilang di Semenanjung Malaysia, Sabah, Sarawak serta Kalimantan, Indonesia.

Untuk maklumat lanjut, sila hubungi:

Asmad Putra bin Abdul Samad

Ketua, Perhubungan Pelabur & Komunikasi Korporat TH Plantations Berhad

Tel: +603 2603 4774 Mobile: +60123785701

Email: asmadputra@thplantations.com

